

# CHINBRIDGE INSTITUTE

## Hruaitu Dirhmun Ah Nu Teltumnak: Chin Sianghleirun Siangngakchia Bu Chungah Nu Hruaitu Teltumnak

---

---

**Ni Hlei Tial**

**02-Nov-21**

*2010-2011 in 2019-2020 cacawn kum tiang Chin Sianghleiruun Siangngakchia Bu chung ah nu hruaitu 36% an i tel i cu 36% chung ahcun a biapi deuhmi hmunhma ah zatuak 17 hrawng lawng an i tel. Cun, atu tiang ah hi dothlatnak ah aa telmi sianghleiruun siangngakchia bu chung ah nu President pakhat hmanh an um rih lo. Ruahchannak pakhat a ummi tu cu 2015 hlan nakin 2015 hnu ah vice president le assistant secretary tibantuk a biapi deuhmi hmunhma ah nu hruaitu an karh deuh ti hmuh khawh a si.*



Except where otherwise noted, content of this work is licensed under Creative Commons Attribution 4.0 International (CC BY 4.0)

© Some rights reserved. Published in 2021.

© 2021 Chinbridge Institute (Center for Research and Social Studies)  
789, Dingdi Street, Chin Oo Sii, Zaythit Ward, Hakha, Chin State, Myanmar  
Tel: +959796213362; +959892238330  
Email: [chinbridgeinstitute@gmail.com](mailto:chinbridgeinstitute@gmail.com)  
[www.chinbridgeinstitute.org](http://www.chinbridgeinstitute.org)

**First Edition 2021** – updates at [www.chinbridgeinstitute.org](http://www.chinbridgeinstitute.org)

Please contact [chinbridgeinstitute@gmail.com](mailto:chinbridgeinstitute@gmail.com) if you have questions or comments with respect to content, or if you wish to obtain copyright permission for your intended use that does not fall within these terms.

### **Disclaimer**

The views expressed in this publication are those of the author and do not necessarily reflect the views and policy of the Chinbridge Institute (CI).

### **Suggested Citation**

Tial, Ni Hlei (2021), *Hruaitu Dirhmun Ah Nu Teltumnak: Chin Sianghleirun Sianghngakchia Bu Chungah Nu Hruaitu Teltumnak*. Chinbridge Institute, Hakha

## Hruaitu Dirhmun Ah Nu Teltumnak: Chin Sianghleirun Siangngakchia Bu Chungah Nu Hruaitu Teltumnak

Ni Hlei Tial

### I. **Biahram Domhnak**

Nu le pa tlukruannak hi vawleicung pumpi huap in an aupi cuahmah mi zatlangnun thanchonak caah a biapi tuk mi thil pakhat a si. Myanmar ram pumpi huap zong in an aupi cuahmah i Chinmi zong nih voidang nak in biatak thlak deuh in aupi mi pakhat a hun si ve. “Nu le pa tlukruannak cu tlukruannak hmuitinh tiang lawng a si lo. Sifah raldohnak ah, a ngandammi thanchonak karhter nak caah le uknak tha dirh nak ding ah a herh hmasami hriamnam a si” tiah Kofi Annan nih a ti (Lusigi 2018). Nu le pa tlukruannak hi miphun thanchonak caah a biapi taktak mi tungthlur a si. “Ram pumpi daihnak taktak le zapi i teltumnak a um khawh taktak nakding ahcun rorelnak dot kip ah nu roreltu an i tel ve a hau” tiah TNI nih a ti (TNI 2016). UNDP nih, Myanmar cozahpi i a hmuitinh a simi mipi hrambunh rorelnak le tanglei-in-cunglei a kaimi rorelnak le thanchonak hmuitinh a tlamtlin khawh nakding ah khuate level uknak ah nu hna tlukruang tein an i teltum a biapi tuk tiah a ti (UNDP 2015).

Nihin ni Laimi kan zatlang nun zoh tikah nu le pa tlukruannak a um tuk loin a lang. A bikin, hruainak lei kan zoh tik ah hruaitu dirhmun ah nu an i tel tuk lo ti hi hmuh khawh mi a si. Tahchunnak ah 2015-2020 Chin Ramkulh Hluttaw ah nu pakhat hmanh an i tel lo. Zei ruang ah dah hruaitu dirhmun ah nu an i tel lo ti hi ruah awk a um ngai mi biahalnak a si. Nu le pa tlukruannak a um khawh nakding ahcun hruaitu dirhmun ah nu tam deuh in i tel khawh a herh.

Cucaah, nu nih hruai tu dirhmun ah zeitluk in dah an i tel, zeidah dawnkhaan tu a um ti bantu dothlat hi a biapi ngaingai mi thil pakhat a si. Sianghleiruun siangngakchiabu chung ah nu zeitluk in dah an i tel ti le cu bantu i teltumnak dingah zeidah dawnkhaantu a um timi nih hmailei hruaitu dirhmun ah nu an i teltum ning a langhter khawh. Cucaah, hi capar hi Chin Sianghleiruun Siangngakchia Bu chung ah nu hruaitu zeitluk indah an i teltum? Cun, Sianghleiruun Siangngakchia Bu ah nu teltum nak ding ah zeipawldah dawnkhaan tu a um? timi dothlat le langhter aa zuam. Hi capar nih zeidah ruangah dah nu nih hruaitu dirhmun ah i teltumnak a tlawm timi le zeitin dah nu nih hruaitu dirhmun ah an i tel khawh deuh lai timi langhter aa tim.

### II. **Dothlatnak tuah Ningcang (Research Methodology)**

Hi dothlatnak ahhin quantitative dothlat ningcang le qualitative dothlat ningcang pahnih komh in hman a si. Hi capar a dotkhatnak nih Sianghleiruun Siangngakchia Bu chung ah nu hruaitu zeitluk in dah an i tel timi hngalh nakding ah Chin Sianghleiruun Siangngakchia Bu panga (5) hna i an cazin zohchunnak a tuah. 2010-2011 cacawnkum thok in 2019-2020 tiang hruaitu cazin zoh in nu hruaitu zeitluk in dah an i tel ti zohfelnak a tuah. Hruaitu an zapi minung 308 chung ah nu hruaitu an i teltumnak zohchunnak tuah a si. Cun, Sianghleiruun

Siangngakchia chung ah nu teltumnak ah dawnkhantu a um le um lo, a um ahcun ze i bantuk pawl dah an si ti hngalh khawh nakding caah Sianghleiruun Siangngakchia Bu ah hruaitu a rak tuan balmi, a tuan lio mi le sianghleiruun a kai lio mi hna, 27 interview tuah an si.

### III. Dothlatnak Huap le Tlamtlin Lonak (Scope and Limitation)

Hi dothlatnak nih hin Chin Sianghleiruun Siangngakchia Bu chung ah nu hruaitu zeitluk in dah an i tel timi zohfelnak a tuah i 2010-2011 in 2019-2020 cacawnkum kum 10 karlak Sianghleiruun Siangngakchia Bu panga (5) chung in zoh a si. Chin Sianghleiruun Siangngakchia Bu hna, tam deuh le tlamtling deuh in khawmh khawh ahcun a dikfel deuhmi a phi a chuak deuh lai nain COVID-19 rai ruang ah, duh ning in khawmh khawh a si lo caah Sianghleiruun Siangngakchia Bu panga (5) cazin lawng khawmh khawh a si. Culawng siloin, thlanglei Chinram in Sianghleiruun Siangngakchia Bu kong tu cu COVID-19 rai le buaibainak ruang ah khawmh khawh a si lo. Cun, dothlatnak ah telhmi sianghleiruun bu cheukhat cu cazin tlamtling tein an ngeih lo caah kum a cheukhat i hruaitu cazin pawl telh khawh an si lo.

Cu pinlei ah, interview zong mi tam deuh tuah ding in timhtuah a rak si nain COVID-19 rai le ram buainak ruang ah, duh ning in tuah khawh a si lo. Cu hlei ah, minung pumpaak bak in tonnak le biaruahnak ngeih khawh ahcun a tlam a tling deuh tuk hnga ding a sinain COVID-19 rai ruang ah cheukhat cu pumpaak in ton awk an tha ti lo i phone in chawnh an si. Cun, cheukhat nu ramkhel hruaitu hna le zatlangbu hruaitu hna zong ton te dingin timhlahm a rak si ko nain ramkhel buaibainak ruang ah ton khawh an si ti lo.

### IV. Chin Ramkhel ah Nu Teltumnak

Sianghleiruun Siangngakchia Bu chung ah nu teltumnak kan zoh hlan ah ramkhel lei ah nu teltumnak dirhmun tlawmpal in zoh ta hna usih. Ramkhel lei hruainak ahhin Kawlram huap in hruaitu dirhmun ah nu i teltum nak a niam ngaingai. 2010-2015 Cozah caan kan zoh tik ah, Pyidaungsu Hluttaw ah nu hi 6% lawng an i tel kho i Ramthen le Ramkulh dihlak huap zong ah 3.8% lawng nu MP an i tel kho (Latt et al., 2017; (Lian 2015). Avoihnihnak rampumpi thimnak (2015 general election) tu ahcun Nu MP (Member of Parliament) an hun karh deuh nain Pyidaungsu Hluttaw ah 13% lawng an si thiam rih (Latt, et al. 2017). MP minung pahra ah pakhat tluk lawng hi nu MP an si i Myanmar ram cu vawleicung nu aiawhtu a san le a niam tahnak ah ram 191 chung ah ram 159nak ah a um (GEN 2017).

Hi capar tial tiang ahhin Chin State Hluttaw ah nu MP pakhat hmanh an um rih lo timi hmuh khawh a si. 2010-2015 Cozah caan chung ah nu MP pakhat te, Pyithu Hluttaw ah kan rak ngeih. Thantlang Constituency in a rak kaimi Pyithu Hluttaw MP, Pi Za Tlem hi Chimramkulh chung in nu MP a tling hmasa bikmi a si (UEC 2010).

2015 Thimnak kan zoh tik ah 2010 lio nakin nu MP zatuak a kai deuh ti hmuh khawh a si. 2015 thimnak ahcun Chin ramkulh chung in nu MP pathum an chuak. Zomi Congress for Democracy (ZCD) party in Pi Cing Ngaih Mang, National League for Democracy (NLD) party in

Pi Khin Shwe Lun le Pi Ni Sui Lian hna an si. Pi Cing Naih Mang hi Tonzang peng constituency No.7 in Amyotha Hluttaw ah a tling, Pi Khin Shwe Lun hi Kanpetlet peng constituency No.9 in Amyotha Hluttaw ah a tling ve i Pi Ni Sui Lian hi Thantlang constituency in Pyithu Hluttaw ah a tling (UEC 2015).

A hnu bik thimnak a si mi, 2020 thimnak kan zoh tikah 2015 nakin nu MP milu a kai deuh ti kan hmuh khawh. 2020 thimnak ahcun Chin ramkulh chung in nu MP minung pali an chuak. Kanpetlet in Amyotha Hluttaw ah Pi Khin Shwe Lun (NLD), Hakha in Amyotha Hluttaw ah Dr. Aye Aye Ngun (NLD), Tonzang in Pyithu Hluttaw ah Pi Cing Ngaih Mang (ZCD) le Thantlang in Ramkulh Hluttaw ah Pi Ni Sui Lian (NLD) tiah nu MP pali an tling. Asinain, thimnak tuahnak ah dikfellowak a tamtuk ti in Ralkap nih uknak an laak i hi pali hna cu Hluttaw chung ah an thu manh ti lo (UEC 2020).

Hi Hluttaw chung i nu teltum ning zoh in kan chim ahcun ramkhel ah nu teltumnak a niam tuk ti khawh a si. Cucaah hmailei ah ramkhel lei a si zong ah, biaknak lei le zatlangbu ah a si zong ah nu hruaitu zeitluk in dah an rak um lai timi biahalnak tuah lo awk a tha lo. Cu hmailei nu hruaitu teltumnak cuanh khawhnak cu Sianghleiruun Siangngakchia Bu chung ah nu hruaitu zeitlukdah an i tel timi nih a thlaam a langhter khawh men hnga. Cucaah, Sianghleiruun Siangngakchia Bu chung ah, nu hruaitu zeitluk in dah an i teltum ti a tang ah kan zoh lai.


## **V. Chin Sianghleirun Siangngakchiabu ah Nu Hruaitu Teltumnak**

Hi dal 5nak ahhin Chin Sianghleirun Siangngakchia Bu chungah nu hruaitu zeitluk in dah an i teltum timi kan zoh lai. Hi Sianghleiruun Siangngakchia Bu pawl hi ram le miphun thanchonak caah sianghleiruun a kaimi siangngakchia hna nih hmunkhat teah riantuanti khawhnak caah le nunphung thanchoternak, fimthiamnak thanchoternak, hmailei ah hruaitu tha tampi chuah khawhnak le sianghleikai chung lila ah mah le mah i zohkhenh le i kilven nak caah tiin dirhmi phu pawl an si. “Na Pahrang cu Na Miphun Caah Hmang (Use Your Talent for Your Nation)” timi Hakha University Students Organization kutken tlangtar bantukin khua le ram caah cawlcangh tinak ngeih khawh nak hnga dirhmibu pawl an si (Zing 2020).

Hruaitu phu umtu ning (organization structure) hi an i khat hna lo nain an i lo pah cio hna. President system an hmang dih hna. Tuanchuaktubu chung ah President, Vice President, Secretary, Assistant Secretary, Treasurer le Assistant Treasurer an i tel. A luan cia kum zeimawzat in cheukhat phu, HUSO tibantuk cu Vice President 1 le Vice President 2 an ngei (Zing 2020). Cu lawng si lo in, information in-charge, Nunphung le Calei Committee, Worship Committee, Sport Committee tibantuk sub-committee zong an ngei hna. Hi capar chung ahcun, President, Vice President, Secretary, Assistant Secretary, Treasurer, le Assistant Treasurer chung in zoh a si. Sub-committee hruaitu pawl cu telh a si lo.

Hi Sianghleiruun Siangngakchia Bu pawl nih ca le nunphung kong seminar, sianghleiruun a kai lai dingmi pawl caah major introduction tibantuk, mino chung ah lungrualnak a um khawh nakhnga lentecelhnak tibantuk, le theihhngalhnak a kauh deuh nak hnga awareness training tibantuk anmah le ti khawh ning cio in an tuah hna. Cucaah, hi sianghleiruun bu chung ah nu hruaitu zeitluk in dah an i teltum timi hi hmailei kan ram ah nu hruaitu zeitluk in dah an chuah lai timi muithlam pakhat a langh ter caah a biapi tukmi a si. A tanglei chart in hin 2010-2011 cacawnkum in 2019-2020 karlak Chin Sianghleiruun Siangngakchia Bu chung ah nu an i teltum ning a dot dot in a rak langhter lai.

**V.1. Chin Sianghleiruun Siangngakchia Bu ah Hruaitu Zatuak**




Hmanthlak pakhatnak nih kan zohmi Sianghleiruun Siangngakchia Bu 5 hna lakin 2010 in 2020 cacawnkum karlak nu hruaitu le pa hruaitu zatuak a langhter. Hi chung ah hruaitu an zapi 308 an si i pa 196 an i tel i nu 112 an i tel.


Chart ah kan hmuh bantukin 2010-2011 in 2019-2020 cacawn kum Chin Sianghleiruun Siangngakchia Bu ahhin nu hruaitu 36% an i tel i Pa hi 64% an i tel. Hi nih a langhter mi cu sianghleiruun bu ah nu riantuantu an tlawm ti a langhter. Nu hi sianghleiruun bu lawng ah si loin ramkhel lei zong in i teltumnak ah an tlawm (Lian 2016).

A tanglei ah zeibantuk dirhmun ah dah nu hruaitu hna zeitluk in dah an i tel ti dotkhat hnu dotkhat in kan zoh hna lai.

### V.2. President Dirhmun ah Nu Teltumnak




A cung i kan hmuh mi chart nih a langhter mi cu President hmuhma i riantuantu hna an zatuak a si. 100% ning in pa lawng te an si. Sianghleiruun bu chung ahhin Nu nih President an tuan bal rih lo timi hmuh khawh a si. Zei ruang ah dah a si hnga timi cu ruah awk a um ngaingai mi a si.



### V.3. Vice President Dirhmun ah Nu Teltumnak


A cung i Chart 3 nak i langhter mi vice president hmuhma kan zoh than tikah, Nu tlawmte an i tel mi hmuhkhawh a si. Zatuak in nu hi 12% an si i pa hi 88% an si. Hi hmuhma ahcun Nu an hun i tel kho ve cang nain a tam-u cu pa lawng te nih an tuan rih timi hmuh khawh a si.

#### V.4. Secretary Dirhmun ah Nu Teltumnak



A cunglei Chart 4 ah kan hmuh bantuikin Secretary hmunhma ahcun Nu riantuan tu hi 2% lawng an si i pa hi 98% an si. Nu hi tlukruang tein kan hmuh khawh rih hna lo ruang ah maw hruaitu dirhmun ah hmunhma tlawm te lawng an ngeihnak a si hnga? Asiloah nu hna nih bu chung riantuannak ah i teltumnak a tlawm ruang ah dah a si hnga? ti hi ruah ding a um ngaimi a si. Hruaitu si ahcun caan zong tam deuh pek a herh ca ah hin nu zong nih caan tam deuh pek ve in mitampi a hruai kho tu si i zuam ve ahcun, hmailei ahcun Laimi ah nu hruaitu tampi chuah khawh a si.


#### V.5. Assistant Secretary Dirhmun ah Nu Teltumnak



A cung i chart kan zoh tikah Assistant Secretary hmunhma ahcun nu riantuantu tlawmte an hun tam deuh mi hmuh khawh a si. Zatuak in nu hi 18% an si i pa hi 82% an si. Rak langhter cia mi chung in hruaitu hmunhma poh ahhin nu riantuan tu a tlawm deuh peng rih ti zong hmuh khawh a si.




### V.6. Treasurer Dirhmun ah Nu Teltumnak



Hi chart nih a hun langhter mi cu ngunkeng hmunhma kha a si. Hi hmunhma ah cun riantuantu hi nu lawng te an si. Zatuak 100% ning in nu nih an tuan dih. Nu hruaitu aa tel mi hnihchun hmanh hi ngunkeng deuh lawng te an si. Zei ruang ah dah nu hi ngunkeng hmunhma tu ah cun riantuantu an tam ngai nain a cung lei hmunhma (eg. president, vice president, le secretary) tibantuk tu ahcun teltumnak a tlawm deuh hnga ti hi ruah awk a um ngaimi a si ve.

### 5.7. Assistant Treasurer Dirhmun ah Nu Teltumnak



A donghnak bik ah ngunkeng bawm tu hmunhma kan zoh ah cun nu riantuan tu hi 86% an si ii pa hi 14% an si. Ngunkeng hmunhma tu ahcun nu nih an tuan deuh ti a lang. Nu hi ngunkeng hmunhma lawng ah maw rinhchan awk an that hnga ti zong biahalnak tha ngaimi a si ve. Pa zong nih phaisa ken khawh a si bantu kin nu zong nih hruaitu a lubik a tuan khawh ve mi a si ko lo maw? timi biahalnak nganpi a um. Lunglawmh awk a simi pakhat cu, 2016

hnulei ahhin ngunkeng a silomi a dang hruaitu dirhmun ah nu an hun i tel deuh ti hmuh khawh a si. Asinain, pa he tahchunh ahcun a tlawm taktak lawng a si rih ko.

A cunglei ah kan hmuh bantuikin Chin sianghleirun siangngakchiabu chung ah hruaitu dirhmun in nu teltumnak a niam, 36% lawng a si ti kan hmuh khawh. Cu, 36% chung zong ahcun ngunkeng dirhmun ah a tam u cu an si i hruaitu luzik deuh ahcun a tlawm chimchin lawng siloin nu president atu tiang ah pakhat hmanh an um rih lo. Cucaah, Chin sianghleirun siangngakchiabu chung ah nu hruaitu zeiruung ahdah an tlawm ti bia hal lo awk tha lo in a rak um.

## **VI. Chin Sianghleiruun Siangngakchia Bu Hruaitu Dirhmun ah Nu Teltumnak Dawnkhaantu le Tawlrel Ning**

A cung lei kan zoh bantuikin Chinmi kan mibu zoh tikah ramkhel hruainak lei ah nu hruaitu an tlawm tuk timi hmuh khawh a si. Cucu zei ruang ah dah a si timi kawh a biapi. Fimthiamnak a cawng cuahmah mi sianghleiruun siangngakchia bu zong ah nu hruaitu an tlawm timi hmuh khawh a si. Zei ruang ahdah fimthiamnak a cawng cuahmah mi hna chung zong ah hruaitu dirhmun in nu i teltumnak a tlawm, zeitindah kan lawnh khawh lai timi pawl hi hika dal nih langhter aa zuam lai.

### **VI.1. Hruaitu Dirhmun ah Nu Teltumnak Dawnkhaantu Pawl**

Hika dal ah hin zeiruung ahdah Chin Sianghleiruun Siangngakchia Bu chung ah nu teltumnak a tlawm i zei pawl dah dawnkhaantu bik an si timi langhter khawhnak dingah sianghleiruun siangngakchia bu chung ah hruaitu a rak tuan balmi hna le a tuan liomi hna hal an si. Cu dawnkhaantu hna lakah a biapi deuh tiah bialettu nih an ruahmi pawl hna cu a tanglei bantuik in an si.

#### **VI.1.1. Nunphung Dawnkhahnak A Sang Tuk**

Chinmi mibu chung ah a luan cia caan tein nu namnehnak a rak um cang. Tahchunnak ah, “nu bia in bia thlu hlah, sia pi ki in laam thlo hlah” ti bantuik , Lai phungthluk a rak um. A sullam cu nu cu bia khiak tu an si awk a si lo ti nak khi a si. Cun nu nih ro co khawh zong a si lo. Uk tu bawi tuan khawh zong a rak si lo. Cun nu ruahnak cu va ral pet lo ti bantuik, a sullam cu nu cu an kharuahnak a pian deuh tinak a si. Mah bantuik in nu a niam deuh in hmuhnak nihhin nu pawl hruaitu dirhmun ah an tlawm deuhnak a ruang si tiin bia halmi hna nih an chim.

Chin ramkulh lawng ah siloin Myanmar ram pumpi huap hrimhrim ah cubantuk nunphung ruang ah nu teltumnak a niam tiah Gender Equality Network (GEN) nih a ti. Tahchunnak ah, innchungkhar rian cu nu rian a si timi ruahnak a sang tuk. Nu cu pa nakin a phuhrin (*bone*) niam deuh ti hmuhnak zong a um. Nu cu an thiltikhawnak a niam deuh i hruaitu dirhmun ah an i tlak lo ti ruahnak le mitampi nih hruaitu ding ah nu nakin pa an duh deuh hna

tibantuk nuphung ruang ah ramkhel ah nu teltumnak a niamnak pakhat a si (UNDP, 2015; GEN, 2017; Lian, 2015). Cubantuk nunphung ruang ah nu MP a tlingmi hna cu mi sawhsawh nak in tampi sikhawhna a ngeimi an si a rak herh. Tahchunnak ah,

Nu MP pawl cu pa MP nakin catang sang deuh an ngei; nu MP cu zaraan chungkhar nak in tanpitu chungkhat-rualchan an ngei deuh; mi zaraan nakin mah le mah i zumhnak le ramkhel tumtahnak ngan deuh an ngei; zaraan nakin nunphung phihkhamnak pahchih ngamnak an ngei deuh; cun an chungkhar ah mi nih an rak upat ngaimi pa an ngei khun (GEN 2017).

Cucaah, Chin Sianghleiruun Siangngakchia Bu telh in hruaitu dirhmun ah nu teltumnak a tlawm deuhnak a ruang bik pakhat cu nu le pa thleidannak nunphung ruang ah a si ti khawh a si. Nunphung nih dawnkhanhna a san tukmi hi Sianghleiruun Siangngakchia Bu chungah nu hruaitu an tlawmnak a ruang nganpi pakhat a si.

### **VI.1.2. MahleMah I Zumh Lonak**

Mahlemah i zumhlonak (lack of self-confidence) hi Sianghleiruun Siangngakchia Bu chung ah nu hruaitu an tlawmnak a ruang pakhat a si ve ti hmuhchuah khawh a si. Mahlemah zumh lo ti tik ahhin, cheukhat nu cu kei cu ka tuan kho bal lai lo, mah hi cu pa rian deuh si timi ruahnak an ngei. Cun, nu cu hruaitu an si kho lai lo ti hi a tam. “Mi zapi vun hruai nakding ah mahlemah i zumhnak (self-confidence) a ngeimi an tlawm tuk” tiin biahal mi hna nih an chim. Cucaah mahlemah i zumhlonak ruang zong ah hin hruaitu dirhmun a kan phakter khawh lo i an tlawm deuhnak a ruang si ti khawh a si ve.

Hi mahlemah i zumh lonak hi a cung i kan zohmi nunphung phihkhamnak he zong pehtlainnak a ngei ti khawh a si. Chinramkulh lawng ah siloin Myanmar ram pumpi hrimhrim ah nu hi pa nakin mahlemah i zumhnak an ngei lo deuh. “Ramkhel lei hruaitu si nakding le i zuam nakding ahhin pa nakin nu hi mahlemah i lunnak an ngei lo deuh” tiah GEN nih an ti (GEN 2017).

### **VI.1.3. KenKawi Hau In Umnak**

Nu hi pa nakin an thinlung a nenno deuh, cun thazaang lei zong in a tha tlawm deuh mi an si. Laitlang lei kan i hruai ning ahcun tuan awk hnga dingmi rian tam deuh hi hruaitu nih tuanvo lak dih deuh a si tikah, pa pakhat nih a tuah khawhmi kha nu caah cun mi pahnih nih tuah hau tibantuk a si theu tawn. Cucaah, rian kha duh ning in hma kal tawn lo tiin bialettu tam-u nih an chim. Cu ruang ah, kenkawi hau in an um tawn ruang zong ahhin nu pawl hruaitu dirhmun ah teltum nak a tlawm ti khawh a si.

## **VI.2. Hruaitu Dirhmun ah Nu Teltumnak Dawnkhaantu Tawlrel Ning**

Chin sianghleirun siangngakchiabu chung ah pa nakin nu hruaitu an tlawm deuhnak a ruang cu dawnkhaantu tete a um ruang ah a si ti a cung ah kan hmuh. Cu dawnkhaantu pawl cu zeitin dah tawlrel khawh a si lai ti hika dal nih langhter aa zuam.

### **VI.2.1. Hmunhma Pek**

Pakhatnak bik ah hmunhma pek ve hrim i tuanter a biapi ngaingai. Pa pawl zong nih thazaang pek in dirkamh ve ding. Cu tiin dirkamh i hmunhma pek ve ahcun hruaitu dirhmun ah tam deuh an i tel kho lai i hmailei zong ah aa pehtlai kho thluahmahmi a si tiin bialettu tam-u nih an chim.

Pa nih nu pawl thazaang pek le hmai ah fawnter ding a biapi ngaingai. Nu zong nih tuankhawhnak pahrang an ngei ve ti hngalhpiak a biapi fawn. Cun, nu pawl zong nih nu nih kan tuah khawh ve ko timi lungput ngeih a herh. Nu le nu i tanpi (support i pek) a herh tuk. Cuti hmunhma pek ahcun nu pawl nih bu chung ah hruaitu a tlaimi an karh lai i nu le pa tlukruannak a karh lai pinah ram le miphun thanchonak a karh lai.

### **VI.2.2. Bu Cawlcanghnak ah Caan Pek**

Nu cu innchungkhar rian a tlaimi an si caah a lenglei bu cawlcanghnak pawl ah hin caan an pe kho tuk lo. Cu ti caan an pek khawh lo tikah hawi sin cawlcangh ning siloah bu cawlcangh ning ti bantuk kha an thiam tuk ti lo. Cucaah, hruaitu dirhmun ah i tel khawh ve nakding ahcun caan zong kha pek khawh ve i mah bu hi zeitin dah a cawlcangh, zei dah aa hmuitinh, timi theih kha a herh ngai vemi a si tiah bia halmi nih an chim. Cucaah, nu pawl hruaitu dirhmun ah i tel khawh nakding ahcun cawlcanghnak poh ah a caan pek a hau ti khawh a si.

Nu nih caan an pek khawh nakding ahcun innchungkhar rian kha nu lawng rinh awk an tha ti lo. Cucaah, nu rian pa rian timi rian thleidannak lungput kaltaak a herh. Innchungkhar rian cu nu rian a si timi lungput kan ngeih chung cu pa tluk in nu hruaitu chuah khawh nakding ah lam a har ti khawh a si. A ruang cu, innchungkhar rian nih a tlaih peng ahcun nu nih mibu chung ah a duhning in caan a pe kho lai lo i aa teltum kho lai lo. Cucaah, nu rian pa rian timi thleidannak um ti lo ding in i zuam a herh.

### **VI.2.3. Hruai Ningcang Thlen**

Chinram kan i hruai ning kan zoh tik ahhin a tam deuh cu rian hi a cung lei hruaitu deuh nih hin tuan a tam. Rian kha i phawtzamh thlu lem loin hruaitu upa deuh lawng nih tuan a si. A tuanmi nih an tuan ngai sinain a tuan lo mi rak um lengmang ve a si. Hi bantuk hruainak nih hin thazaang hman hauh caan ahcun nu caah a har deuh mi dirhmun a si. Cucaah, rian i phawtzamh thiam i minung hman thiam ahcun nu pawl zong hi hruaitu dirhmun ah tam pi an i tel kho lai tiah bialettu hna nih an ti.

### **VI.2.4. Awareness Tam Deuh Tuah**

Hruaitu dirhmun ah nu pawl an tlawm deuh nak hi kan lungput ah nu pawl namnehnak a um rih ruang ah a si. Hlanlio i kan pupa hna nih an rak zulhmi nih kan ruahnak a khuh tuk rih tikah nu le pa hi tlukruang tein hmuh hi a tlawm tuk. Cubantuk kan ruahnak a tlawm deuh hnu lawng ahhin nu hi bochan khawh zumh khawh deuh an si hnga. Cucaah, nu le pa tlukruannak

kong he pehtlai in siseh hruainak kong he pehtlai in awareness tam deuh in tuah khawh ahcun zapi kan ruah nak a thangcho deuh lai, cu hnu lawng ah nu hi hruaitu dirhmun ah tampi an i tel kho lai tiin an chim.

Nu le pa hi tlukruang tein sermi minung sinak tlukruang tein a ngeimi, sinak man aa tluk tein a ngeimi le nuhrin covu tluk tein a ngeimi kan si ti hngalh le i nunpi a biapi tuk. Cubantuk in nu le pa cu Pathian muisam keng in sermi veve kan si i aa tlukruangmi man le covu a ngeimi kan si ti hngalh nakding ah cawnpiaknak tampi tuah a herh. Cubantuk lungput kan mipun ning in kan ngeih khawh ahcun sianghleirun siangngakchiabu chung lawng ah siloin hmunhma kip ah nu hruaitu pa tluk in an i tel kho lai i a hmunmi thanchonak taktak kan ngei kho lai.

## **VII. Biatlang Kawmnak**

Ram le mipun thancho nakding ah nu le pa tlukruannak hi a biapi tukmi a si. Nu le pa tlukruannak a um khawh nakding ah hruainak dot kip ah nu roreltu an i tel ding a biapi tuk fawn. Chinmi kan zatlangbu le mibu hruainak kan zoh tik ah, ramkhel ah nu hruaitu teltumnak a tlawm ti hmuh khawh a si. A hlei in hmailei ah hruaitu dirhmun a rak tlai lai ding sianghleirun siangngakchiabu chung ah nu hruaitu an tlawm ti kan hmuh khawh.

2010-2011 in 2019-2020 cacawn kum tiang Chin Sianghleiruun Siangngakchia Bu chung ah nu hruaitu 36% an i tel i cu 36% chung ahcun a biapi deuhmi hmunhma ah zatuak 17 hrawng lawng an i tel. Cun, atu tiang ah hi dothlatnak ah aa telmi sianghleiruun siangngakchia bu chung ah nu President pakhat hmanh an um rih lo. Ruahchannak pakhat a ummi tu cu 2015 hlan nakin 2015 hnu ah vice president le assistant secretary tibantuk a biapi deuhmi hmunhma ah nu hruaitu an karh deuh ti hmuh khawh a si.

Chin Sianghleiruun Siangngakchia Bu chung ah nu nakin pa hruaitu an tam deuhnak a ruang tampi a um kho. Cu hna lak ah bialettu pawl nih an langhtermi cu, a pakhatnak ah, nunphung dawnkhannak a sang tuk ti hi a si. Nu cu pa nak in a niam deuh ah hmuhnak tibantuk, nu nih bawi tuan khawh a si lo tibantuk, nu thleidannak ruahnak hna hi hruaitu dirhmun i nu teltumnak a niamtertu pakhat a si ti hmuh khawh a si.

Cupin ah, nu hrimhrim nih mahlemah i zumhnak a niam timi hmuh khawh a si. Nu chung ah mahlemah i zumhlonak a um tik ah hruaitu ka tuan kho ve ko, tuan khawhnak ka ngei ve ko timi le zuamnak ngei ti loin kei cu ka tuan kho bal lai lo timi lungdernak hi dawnkhaantu pakhat a si ve ti hmuh khawh a si. Cu lawng siloin, nu tampi cu kenkawi hau in a ummi an tammi hi dawnkhantu pakhat a si ve. Chin Sianghleiruun Siangngakchia Bu hruainak ah hruaitu nih zeizong vialte tuah dih phun hman deuh a si tikah thinlung a nenno deuhmi le thazaang a der deuhmi nu nih tuanvo vun lak ding tiang a mah thiltikhawhnak cung ah a dir khomi an tlawm. Hi pawl dawnkhaantu ruang ahhin nu hruaitu teltumnak a tlawmnak a si ti hi dothlatnak in hmuh khawh a si.

Cucaah, hruaitu dirhmun ah nu pawl hmunhma an ngeih khawh deuh nakding ahcun nu le pa hi tlukruang tein hmuh khawh a hau. Kan i hruai ningcang zong ahhin hlawt haumi zultphung thing kha hlawt ii chantiluan ning in kan i hruai khawh ahcun nu ca zong ah lam tapi a um kho ve. Cun mahlemah zumhnak hi a biapi ngaingaimi a si. Caan zong a si khawh chung in pek ve a hau ii ral tha tein hmaichuak lengmangmi si khawh zong kha hruaitu dirhmun ii i tel khawh nakding ahcun a herh ngai vemi a si. Cu ti caan pek khawh nakding ahcun chungkhar lei nih thapek a hau ii theihthiam zong a hau ngaimi a si.

Pa uknak tang ah sau tuk kan um tikah pa lawng uktu an si kho ti mi ruahnak, pawngkam nih muisam ser ning in a thang lianmi ruahnak pawl kha a tlaw a herh. Awareness tapi tuah khawh asi ahcun mah bantuk ruahnak kha a zor lai ii mipi nih nu pawl cung ah ruahchannak le bochannak kan ngeih deuh hna lai. Cu ti kan tuahnak nih cun nu pawl hruaitu dirhmun ah tapi teltumnak a ngeiher khawh hna lai.

Atawinak in chim ahcun, nu nih hruaitu dirhmun ah tam deuh an i teltum khawh dingah, nu zong pa tluk tein hmunhma pek, nu zong nih bu chung cawlcanghnak ah caan pek, hruai ningcang thlen a a herhmi thlen, le awareness training tibantuk tapi tuah a herh.

## Chirhchanmi Cauk Pawl

- GEN. 2017. *Gender & Politics in Myanmar: Women and Men Candidates in the 2015 Election*. Yangon: The Gender Equality Network.
- Latt, Shwe Shwe Sein, Kim N. B Ninh, Mi Ki Kyaw Myint, and Susan Lee. 2017. *Women's Political Participation in Myanmar: Experiences of Women Parliamentarians 2011-2016*. The Asia Foundation.
- Lian, Sang Hnin. 2015. "Gender Gap and Women's Political Participation in Burma/Myanmar." Chiang Mai: Chiang Mai University.
- Lusigi, Angela. 2018. *Gender Equality is So Much More Than A Goal*. August 28. <https://www.africa.undp.org/content/rba/en/home/blog/2018/gender-equality-is-so-much-more-than-a-goal-.html>.
- TNI. 2016. "No Women, No Peace: Gender Equality, Conflict and Peace in Myanmar." *Myanmar Policy Briefing*, January 18: 1-27.
- UEC. 2015. *2015 General Election*. <https://www.uec.gov.mm/>.
- . 2020. *2020 General Election*. <https://www.uec.gov.mm/>.
- . 2010. *The Result of Votes Received by Each Pyithu Hluttaw Candidates*. November 7. [https://www.uec.gov.mm/show\\_data\\_content.php?](https://www.uec.gov.mm/show_data_content.php?)
- UNDP. 2015. *Women & Local Leadership: Leadership Journeys of Myanmar's Female Village Tract/Ward Administrators*. UNDP Myanmar.
- Zing, Ngun Len. 2020. "Chin University Student Organization Activities: A Case Study of Hakha University Student Organization" in *Democracy Le Sianghleirun Fimcawnnak: Chin Ramkulh Sianghleirun Fimcawnnak Dirhmau Zohthannak*, by Ram Hlei Thang and Van Cung Lian, 45-48. Hakha: Chinbridge Institute.